



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Historien/|| Von des Ehrwürdigen in || Gott seligen theuren
Manns Gottes/ D.|| Martin Luthers/ Anfang/ Lere/ Leben/
Stand=||hafft bekentnuß seines Glaubens/ vnd Sterben/
Or=||denlich der Jarzal nach/ ...**

Mathesius, Johannes

Nuernberg, 1573

VD16 M 1495

Vorrede inn D. Martini Luthers Historien.

urn:nbn:de:hbz:466:1-32268

Vorrede inn D. Martini Lu-
thers Historien.

Den Erleuchten/ Ehrwür-
digen/ Achtbaren/ Hoch vnd Wolgelerten
Herren/ Rector/ Pastor/ Dechant/ Doctorn/ Pro-
fessorn vnnnd Magistern/ der Christlichen Kirchen vnnnd
hochlöblichen Vniuersiteten / in der Churfürstlichen
Statt Wittenberg/ meinen Großgünstigen vnd
geliebten Herren Preceptor vnd
Freunden.

Gnad vnd Fried durch Jesum Christum/ Amen.

Nach dem ich diese vier vnnnd
zweinsig Jar / neben den Sontags Euange-
lien / Catechismo vnd Propheten Samuel/ etli-
che Psalmen Davidis/ vnd S. Pauli Episteln/
Auch meine Sarepta oder Bergpostill/ vnd vil
Hochzeitpredig extraordinarie, mit der hülffe Gottes / meinen ge-
liebten Pfarrkindern gethan / hab ich inn meinem alter die schöne
vnd warhafftige Historien / von Lere/ leben vnnnd sterben/ des Ehr-
würdigen Herren Doctoris Lutheri seligen/ meinen Scheslein bey
der weil auch öffentlich predigen wollen.

Denn weil vns der ewige Sone Gottes/ der oberste Erzbis-
choff vnser Seelen/ durch disen Wundermann von des Antichristi-
grewlichem Reich vnd Lere erlediget/ vnd das verdunckelt Euange-
lion

Vorrede.

lion wider hat anzünden vnd fegen lassen/vnd vil leute/so heut leben/
nit wissen / wie es vor fünffzig Jaren in der vnterdruckten vnnnd ges-
fangenen Kirchen gestanden / vnnnd mancher vndanckbarer/ dieses
grossen Mannes / vnnnd seines getrewen fleiß vnd arbeit schier ver-
gessen wil/ Hab ich für rathsam vnd nützlich angesehen/meiner bes-
folhen Kirchen hievon ein gründlichen bericht zuthun/vnserm Got-
te zu ehren/ vnd lob vnd preis dises seligen werckzeugs Gottes/vnd zu
warem zeugnuß für junge leute / wie Gott durch einen Mann/dise
endliche Reformation angefangen / vnnnd vns zur letzten zeit vorm
Jüngsten tage/ auß der Babylonischen gefengnuß/vnd von dersel-
ben greuel vnnnd Abgötterey/so genedig errettet/vnnnd wider zu den
reinen Brünlein Israellis / der Propheten vnnnd Apostel schrifft ge-
bracht habe / Vnnnd das ich hieneben meine zuhörere erinnere vnnnd
vermane/bey dises Deutschen Propheten vnd seligen auflegers der
heiligen Schrifft freidig vnd bestendig zubeharren.

Guter vnd woluerdienter leute/ durch welche vnser Gott der
Welt dienen lesset/ist doch bald inn dieser argen Welt vergessen/so
seyret die alte listige Schlang auch nicht / so von anfang Christum
in seine Verschen vnd Predigampt gestochen/vnd die reine Lere mit
irem Sawerteng/Trebern/Sprew vnnnd bösem zusatz/vermenges
vnd verunreiniget.

Dieweil ich nun von diesem werden Deutschen Propheten/
den Gott vns Taphiten/vnnnd dem heiligen Deutschen Reich zur
lechte gesandt vnnnd geschencket / bey meinen Deutschen vnnnd lieben
Pfarckindern / als ein geborner Deutscher/von ampts wegen/ inn
meiner Mutter Sprach gepredigt/ Hab ich mit gutem bedacht/dis-
se Deutsche Predig/vnserm Gott/ vñ der seligen Deutschen Theo-
logia zu ehren / solche also Deutsch in druck lassen außgehen/damit
auch menniglich inn Deutschland erinnert werde/was dise Deuts-
che vnd Gottselige Kirche / in der Kron Behem gelegen/von dises
grossen

Vorrede.

grossen Deutschen Propheten Lere gehalten/ vñ das man beständig
bis auff dise stunde/inn diesem Sudetischen Gebirge/bey der Wittenbergischen vñnd Augspurgischen Confession fest vñnd trewlich
gestanden vnd außgehalten habe. Mittler zeit/ists Gottes wille/vñnd
sols der Kirchen gut sein / hoffe ich/meine Söne/Endmenner/oder
meine lieben freunde vñnd Discipel/werden dise Deutsche Historien/
wol zu irer gelegenheit wissen zuuertateinen.

Hieneben sehe ich inn guter zuuersicht bey menniglich/man
werde mich hierinn entschuldiget halten/das ich den leist/form vñnd
schnur/so inn Historien üblich / bisweilen vberschritten. Denn ich
hab/als ein ordentlicher Pfarner vñnd Prediger/jungen vñnd alten/
Leyen vñnd Albern geprediget/Darumb hab ich sollen dise Historien
zum markt/vñnd auff meine zuhörer richten/hab ich mich her
nider gelassen/vñnd bisweilen gemeine vñnd nützliche leren mit ein
sprengen wollen/damit man nicht allein ein blosser Historien/son
dern auch trost/lere vñnd vermanung/vñnd selige Exempel/inn aller
ley Kirchenfellen/haben möchte. Selerten ist gut predigen/die wei
sen sich selbst / was auß Historien zu nemen vñnd zu mercken sey/
Bey Leyen vñnd einfeltigen/sol vñnd muß mans etwas schlechter vñnd
alberer/ bisweilen auch weitleufftiger fürgeben. Doch genug hi
uon/warumb ich dise Historien Deutsch/vñnd auff dise form lasse in
Druck kommen.

Als ich aber dise Deutsche Predig vñnd Kirchenhistorien/ von
vnser Religion/als ein beruffener Prediger/mit gutem bedacht vñnd
rath fürname in Druck zu fertigen/vñ ich bey mir fande/wie Gott
die erleuchte Kirch vñnd Schule zu Wittenberg/ so hoch vñnd gross
mit theuren gnaden/ grossen leuten/vñnd trefflichen gaben verehret/
vñnd mir als ein waren Burger diser löblichen Kirchen/vñnd glieds
maß diser berühmten Vniuersitet/vil trefflicher wolthat vñnd gu
tes willens allda erzeiget/ da ich neben gutem fried vñnd Burgerli
chem

Vorrede.

chem schutz/die rechte Religion vnd gute künst erstlich begriffen/vnd
recht hab brauchen lernen / Habe ich diese Kirchenhistorien / vom
Herren Doctor Luther seligen / meinen Herren Preceptorn vnnnd
freunden/zur danckbarkeit zuschreiben wollen.

Schuldig bin ich/dieser Kirch/ Schul vnnnd gemeiner Statt/
vnd fürnemlich dem löblichen hause vnnnd Churfürstenthumb zu
Sachsen / meinem lieben Vatterland / mich nach meinem vermö-
gen danckbar zu erzeigen. Denn in diser Kirch/Schul/vnd Statt/
vnter dem gnedigsten schutz/vnd auff vnkost des löblichen Churfür-
stenthumbs / ist mir so vil guts vnd wolfart widerfaren/das ich die
tag meines lebens/solches nicht zuerschulden weiß/Mit ehren vnd
danckbarlichem gemüte/ sol vnnnd wil ich als ein danckbarer Schu-
ler/diſs ort/ vnd der theuren leut vnd Schutzherrn erwehnen/nicht
allein auff disem kleinen Erdenkreiß/ Sondern wils Gott/auch im
andern vnnnd künfftigen leben / vor dem Angesicht Gottes/inn der
grossen gemeine Jesu Christi/ für allen Heiligen vnnnd Engeln/des
Deutschen Propheten/vnd seiner trewen Amptgesellen/Professorn
vnnnd Gelerten/Schutzherrn/ vnnnd der seligen stiftung ernchtern
vnnnd erhaltern/diser Statt / Kirch vnnnd Schulen/ in alle ewigkeit
preißlich vnnnd rhümlich vermelden / Als mir mein getrewer Gott/
vnd sein lieber Son hiezu helffen wird.

Mitler zeit sol ich diesen danck vnd mein Schul precium hin-
der mir lassen/vnd die leut vnd stelle verehren helffen/die vnser Gott
für vil ander leuten vnnnd Schulen/ mit Gottseligen vnd Gelerten
leuten/getrewen vnd frommen Schutzherrn verehret vnd beseliget
hat.

Lasse man diſ einen ewigen vnd seligen rhum sein/das vnser
Gott an dem Elbstram / durch das Haus zu Sachsen/ ein Kirch
vnd Schul hat auffrichten/vnnnd mit grossen vnd erleuchten leuten
E zieren

Vorrede.

zieren lassen / durch welche sein gefangene vnd ellende Christenheit / auß der Babylonischen gefengnuß vnd irem greuel errettet / vnnnd der meiste theil Kirch vnd Schulen in Deutschen vnd benachbarten Reich reformirt / vnnnd zu seliger erkentnuß des Herren Christi / vnnnd wie man für Gott gerecht vnnnd selig kan werden / neben vernünftiger geschicklichkeit / vñ rechtem brauch der freyen künste kommen sein. Item / das Gott solche Herren diß orts erwecket / die nicht allein diße Schul gestiftet / vnd ehlich vnterhalten / Sondern auch die reine Lere / so Gott an Elbstram gesendet / wider alle Pforten der Hellen behütet / vnd öffentlich bekandt / steiff vnd fest mit land vnnnd leuten darüber gehalten / vnd Gottes wort / so weit fast die Welt ist / haben außbreiten helfen.

Unser Gott sandte seinen Son auß seinem schoß vnd herzen / vnd verordnet in zum ewigen Prediger vnd Dolmetschen / da er seinen willen / rath vnd beschluß außsprechen / vnd Adam im anfang nach dem falle verkündigen solte / bey Adam vnd seinen frommen Erben / erhielt der ewige Son Gottes diß gnaden vnnnd selig wort / biß auff Enoch vnd Noah / des nachkommen bewareten auch disen vertrauten Schatz / biß auff Abraham / Isaac / Jacob / Joseph vnd Mose. Zu diser zeit stiftet vnd richtet der Son Gottes an / die erste hohe Schul bey dem Tabernackel vnd seinem Stifte / in welcher Schul er der rechte Rector vñ ordinarius war / erkleret selber mündlich den willen vnd rath Gottes / vnd leitet die selige ströme der ewigen weißheit / so auß Batternen herß / in ihm vnnnd dem heiligen Geist von ewigkeit wesentlich waren / in die selige Brünne vnnnd theilet Israelis / wie sie David hernach nennet:

Denn was grosse vnd theure Propheten vnd Könige in Israel gewesen / sind alle von ampts wegen auß diesem lebendigen qual erfüllt / darauß selige wasser entspringen zum ewigen leben / wie denn solche heilsame flüßlein / nicht allein das werde vnnnd gelobte Land wesserten

Vorrede.

wesserten vnd befeuchteten / Sondern auch mit der zeit inn die benachbarten Königreich vnd Monarchien kamen.

Durch Eliam den Tschibiten / leytet der Sone Gottes dise selige flüßlein in Syrien / wie durch den Propheten Jonam die selige Röhre inn Assyrien gen Niniue gefüret ward / Durch Daniel den lieben Mann / der vol genad vnd weißheit war / kompt dis selige wasser Göttlichs worts inn Babylon vnd ganz Chaldea / Mardoschai vnd Esras theilen auch dis selige Wasser auß im Persischen vnd Medischen Reiserthumb.

Summa / was der Sone Gottes mit seinem Geiste / auß Vatern herhen empfangen / vnd in sein außewelte werckzeug vnd gefäß aufgossen / erhelt der ewige Sohne Gottes / wider den leidigen Sathan vnd arge Welt / so der alten Schlangen liegen vnd mordten halff / bis auff dise selige zeit / darinn das ewige vnd wesentliche wort fleisch ward / vnd sichtiglich den rath vnd willen seines Vatern offenbarte.

In der zeit seines fleisches / verordnete der leibhafftige Sone Gottes / wider zwölff neue vnd selige Brunnen / die heiligen Apostel / wie er auch selber / vnd neben im Johannes der Tauffer / vnd hernach die zwölff Apostel / vnd ire Jünger vnd zuhörer / ire hohe vnd Christliche Schulen hielten inn Asien vnd Greckenland / wie auch der Jünger vnd Schuler etlich inn Europam zu vns Deutschen kamen.

Als aber der leidige Sathan disen Brunnenqual von anbegin verstopffe / vnd die seligen röhren mit vnreinem vnd vergifftem wasser / neben seinen Fröschen vnd Kröten verunreinen vnd füllen wolte / schicket der ewige Sone Gottes zu der zeit seine Geistliche röhrenmeister / die solche gefülte oder verstopfte brunnen vnd röhren seges-

Vorrede.

ten/vnd das reine Wasser wider fertigten / oder wie die Propheten reden/die die bösen zusetz vnd gemeng/so vnter das reine Silber gemenget/ wider aufbrennen vnd abreiben solten/das also Gottes wort / doch niemals one anfechtung / sein fortgang hatte. Als aber vnser lieber Herr Jesus Christus in Griechen/ Welschem land/vf Franckreich / auch disen Heilbrunn in Deutschland fertiget/erwecket endlich der Erckeind Jesu Christi/Arum vnd Machomet inn Orient/vnd den Antichrist in Occident/die zuhieben vnd zuboreten die seligen rören Gottes / vnd schlugen an vil orten ire giftige vnd verlipte wasser drein/das endlich ganz Orient nun vil hundert Jar kein gesunden trunck vnd lauter wasser von Gott vnd seinem gnedigen willen/vnd eingebornen lieben Son gehabt.

Dergleichen ob wol inn Occident der Apostel vnd ersten Kirchen Jünger/vil schöne vnd selige wasserstender sehen / da man zu Rom / Paris / Sulda / Westphalen / auch noch des reinen wassers geniessen kondte/ sind doch endlich die seligen brunnen alle/wie Isaacs Wasserbrunne verstopffet / die theiler eingerissen/die rören mit frembden vnd vngesunden wassern vnd leren erfüllet/vnd endlich mit rörwasser vnd nixflachs also verwachsen/das man wenig Himmlischer vnd frischer Wasser in gankem Europa hat gefunden.

Als nun die arme vnd gefangene Christenheit grosse not an dem frischen vnd lautern wasser litte/jammert es den obersten Rörmeyster/den seligen vnd lebendigen brunnen/ der fertiget ein stender in diser Kron Behem/vnd leget wider zwo selige rören/dadurch er sein heilsam Wasser wider an die Aquilonischen örter fertigen liesse/Aber die Philistinischen Wiesenwesserer / Jacobs vnd seines Enigkels Erckeinde/zuschlugen vnd verbrandten dise theiler/vnd zurhieben vnd verstopfften die rören/dadurch Gott die hungerige Seelen trencken vnd erquickten lies.

Bis endlich der Herr Christus die Schul vnd Kirch zu Wittenberg

Vorrede.

Wittenberg auffrichten vnd stifften ließ / da setzet Gott ein neuen Stender vnd theiler / vnd leget newe vnd selige rören / vnd gab sein heilig lebendiges Wort reichlich mit grossen scharen Euangelisten / Vnd ob wol Teuffel vnd sein Antichrist / sich mit aller macht vnd geschwinder list / wider dise Stender vnd rören einliessen / doch blieb der Stender vber aller Menschen gedanken / vnd füret auß dem theiler sein heilsam wasser fast ins ganze Römische Reich / das heut kein rechtschaffene Kirch vnd Schul ist / die nicht des Wittenbergischen Brunnens theilhaftig sey worden / Vnd das ich desmals ander örter geschweige / was wir in disem Joachimsthal von Gottes wort vnd guten künsten wissen vnd haben / bekennen wir mit warheit / das solches alles auß dem theiler zu Wittenberg hieher gefüret. Denn Kirch vnd Schulrören sind zu Wittenberg außgeborn / vnd auß dem Thal zugelegt.

Der ewige Son Gottes erhalte disen seligen Stender vnd Himlischen wassertheiler / neben alle dem rörewerck / so bis auß dise stunde in disen Stender gezepfft ist / vnd behüte alle rören / darein Wittenbergisch wasser gefürt / vor allerley mösichten / vnreinen / giftigen / trüben vnd modichten wassern / so vil böser leut gern in die rören schlagen wolten / reinige vnd sege auch die rören / von allerley gewechse vnd nixflachse / damit der leidige Sathan dis geböre gern wolte verwachsen lassen / vnd das kein Frosch oder Kröte dis rörewerck verstopfe / vnd reume selber weg / vnd werffe auß was morsch / faul vnd zuborsten ist. Dis wünsche ich von grund meines herken / disem seligen Stender / vnd gangen rören.

Weil nun der ewige vnd selige Brunnqual des lebendigen wassers / disen lautern strome zu vnsern zeiten vnter dem hause zu Sachsen gefertiget / vnd dise fünffsig Jar erhalten / vnd selige leut dahin verordnet / der fleiß vnd arbeit wir auß dise stunde genießen / Hab ich dise meine Predigten / von dem Herrn Doctor Martino /

Vorrede.

der warhafftigen/bestendigen/ vnd kiffern rören hiemit gedemcken/
vnd dise Predigten der hochlöblichen Schul vnd Kirch zu Witten-
berg dediciren / vnnnd vnter irem namen andern leuten mittheilen
wollen/ Inn günstlichem vnd dienstlichem vertrauen/meine lieben
Herren vnnnd Preceptores / der alten meiner Herren vnnnd freunde
Schuler vnd nachkommen / werden in solchen meinen danck vnnnd
guten willen / günstiglich gefallen lassen / vnnnd ober disem seligen
wasser vnnnd altem rörwerck halten helffen / damit dis selige wasser
vnuerrucktet vnnnd ungetrübet / ferner gehe/ vnnnd springe ins ewige
leben.

Diz wird dem Herrn Jesu Christo/dem rechten vnnnd lebendis-
gen Brunnen/vnd obersten rörmeister/darnach auch seinen treuen
dienern/ so inn Kirch vnnnd Schulen vnd Regiment/dis wasser von
anfang gefertiget/in ewigkeit gefallen / dadurch vnser lieber Gott/
mit irer grossen sorge/mühe/fleiß vnd arbeit / dis wasser gefertiget/
vnd Gott lob/bis in fünffzig jar gefördert vnd erhalten hat.

Für meine Person (nach dem ich mich one schew bis inn mein
gruben/für ein Burger der Wittenbergischen Kirchen/vnnnd glieds-
maß vnd Schuler derselben Schul / vnnnd ein gehorsamen Vnter-
thanen des Hauß von Sachssen erkenne/ vnd meine Kinder/ vnnnd
Kindskinder / so mir Gott geben möchte / der Schul Wittenberg
untergebe/wie ich dise stund mein lieben Sone in M. Christophori
Pezels disciplin noch habe) Besüh ich mich/meine Söne vnd künfft-
tige Erben/der Christlichen Kirchen vnnnd Schul auffs aller treuw-
lichst/wie ich auch hiemit mich auffs freundlichste bedancke/ für vil-
feltige wolthat/so Kirch / Schul / vnd Obrigkeit/mir drey jar lang
allda / vnd folgend zu Aldenburg in meinem Schuldienst sehr gün-
stiglich / desgleichen meinem Sone drey vergangene Jar/vnd al-
ter meiner Pfarrkinder vnd Collegen kinder erzeiget/ vnnnd ob Gott
will/noch ferner erzeigen wird. Das will ich in gebürlichem gehor-
sam/

Vorrede.

sam/lieb/erew/vnd bestendiger freundschaft/die zeit meines lebens/
vnd forthin inn alle ewigkeit / vmb ewer Ehrwird vnd Achtbarkeit
zuerschulden/auffs aller demütigst beflissen sein / vnnnd für meine
Kind vnd Kindskind/neben meinen lieben Pfarrkindern vnnnd jren
Erben/zu erkennen vnd zu rhümen hiemit erbietig sein.

Denn weil ich mit gedachter Schul vnnnd Kirch/auff erkene-
nuß vnd bekentnuß des Herrn Jesu Christi/inn selige freundschaft
kommen bin / soll mir solches kein Lesterey vnd Mammeluck / oder
vndankbarer Ruck vnnnd verechter des Euangelij erwehren. Est
pietas vere nervus amicitiae. Diß helff mir vnd den meinigen/ vnnnd
allen so beim Herrn Jesu Christo / seinem wort vnd Sacramenten
bestendig in lieb vnd einfalt beharren/vnser ewiger Herz vnnnd Heil-
land Jesus Christus.

Hiemit die löbliche Kirch/Schul/vnd Regiment/in sein schirm
vnd schus/vnd in sein wort der gnaden / allezeit befolhen. Datum
in S. Joachimsthal/welche Kirch bey Doctor Martini lehre/ vnnnd
der Augspurgischen bekentnuß / Christlich vnd bestendig beharret/
vnd gedenckt darbey fuß zuhalten / den fünfften Octobris / Anno
1565.

Johann Matthesius/ ein Burger der Kir-
chen Gottes/ vnd gliedmaß der erleuchten
Schul zu Wittenberg / Pfarrer inn S.
Joachimsthal/vnter vnserm aller gnedig-
sten Herren Keiser Maximiliano dem an-
dern.

Faint, illegible text at the top of the page, possibly a title or header.

Second block of faint, illegible text in the upper middle section.

Third block of faint, illegible text in the middle section.

Fourth block of faint, illegible text in the lower middle section.